

Nunatsinni aatsitassarsiornermi uranimik aatsitassallu allanik ulorianartunik qinngornertalinnik saniatigut tamakkiisumilluunniit piiasoqarsinnaalissanersoq pillugu innuttaasunik taasititsisoqarnissaanik siunnersuut, taasititsinissarlu sioqqullugu inuit ilisimasanik tamakkiinerusunik tunngavisseqqullugit arlaannaannut attuumassuteqanngitsumik suliamillu ilisimasaqarnermik illuinnaasiunngittumillu tunngaveqartumik paasititsiniaanerit aallarteqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.
(Inuit Ataqtigiit Inatsisartuni ilaasortaaitai)

Akissuteqaat

(Aatsitassanut Suliffeqarnermullu Naalakkersuisoq)

Siullermeerinninneq

Naalakkersuisut sinnerlugit Inuit Ataqtigiit siunnersuuteqarnerannut qtsavigaakka.

Uranimik allanillu aatsitassanik qinngornernik ulorianartunik akulinnik aatsitassarsiorluni misissuinissamut piiaanissamullu tunngatillugu akuersaanngilluinnarnissamut tunngaviusoq, 2013-imi ukiaanerani ataatsimiinnerup nalaani Inatsisartut aalajangiinerisigut, atorunnaarsinneqarpoq. Siunnersuutip aappassaanneerpeqarnissaata tungaanut Inuit Ataqtigiit taamanili akuersaanngilluinnarnissamut tunngaviusup atorunnaarsinneqarnissaanut tunngatillugu innuttaasut taasitinneqarnissaat pillugu allannguutissatut siunnersuuteqarput.

Inuit Ataqtigiit allannguutissatut siunnersuutaat Inatsisartuni itigartinneqarpoq, taamanikkut Naalakkersuisuusut akuersaanngilluinnarnissamut tunngaviusup atorunnaarsinneqarnissaa pillugu aalajangiiffigisassatut siunnersuutaat taperserpeqarluni.

Kalaallit Nunaanni amerlanerussuteqartut oqartussaaqatigiippugut, qinersisartut inuit Inatsisartuni qinersisartut soqtigisaannik isumaginnissinnaanerpaasorisatik qinertarlugit. Tamanna aamma isumaqarpoq, qinersisartut Inatsisartuni ilaasortat, amerlanerussuteqartut tungaanniit akuersaanngilluinnarnissamut tunngaviusup atorunnaarsinneqarnissaanut tapersersuisut, qinersimagaat.

Akuersaanngilluinnarnissamut tunngaviusup atorunnaarsinneqarneraniilli marloriarluni Inatsisartunut qinersisoqarpoq, 2014-imi aammalu 2018-imi. Piffissami tassani urani pillugu innuttaasut taasitinneqarnissaannut tunngatillugu apeqqut arlaleriarluni oqallisigineqartarpoq. 2016-imi upernaakkut ataatsimiinnerup nalaani immikkoortut marluk urani pillugu innuttaasunik taasititsinissamik kissaateqarnermik imaqarput. Tamatigut siunnersuutit Inatsisartuni itigartinneqartarput.

Innuttaasunik taasititsinikkut suliaassanik ataasiakkaanik aalajangiisarneq nunatsinni ileqqorinnginnatsigu, tamatumunnga tamanna pissusissamisoortumik nangissutaasutut

Naalakkersuisut isigaat. Tamatumunnga taarsiullugu naalakkersueriaatsitut amerlanerussuteqartut oqartussaaqatigiinnerat atorparput, tassani inatsisinut, suliassanut ataasiakkaanut il.il. isummernissaq, qinersisartut Inatsisartut – Nunatsinni inatsisiliortut - assaannut tunniuttarlugu. Qaqugu suullu tunngavigalugit innuttaasut taaitinneqartariaqaraluarnersut, 2016-imi ukiaanerani ataatsimiinnerup nalaani Inuit Ataqatigiinneersup Peter Olsen-ip innuttaasut taaitinneqarnissaat pillugu siunnersuutaa Inatsisartuni suliarineqarmat, Inatsisartut qulequtaq taanna sukumiisumik oqallisigaat.

Naalakkersuisut isumaqarput akuersaangilluinnarnissap atorunnaarsinneqarnissaa pillugu apeqqutip politikikkut isumagineqarnera ammasumik, kinaassusersiunngitsumik aammalu oqartussaaqatigiinneq eqqarsaatigalugu ingerlasimasoq.

Inatsisartut akuersaangilluinnarnissap atorunnaarsinneqarnissaa pillugu aalajangiinissaat sioqqullugu, tamatuma nalaani, tamatumalu kingorna paasititsiniaanerit, innuttaasunik ataatsimiititsinerit il.il. ingerlanneqarput, aammalu uranimik isumannaatsumik aatsitassarsiorluni misissuineq piianaanerlu pillugit najoqqutassat annertoorujussuit suliarineqarput, taakkualu soqutiginnittunit tamaginnit suli pissarsiarineqarsinnaapput.

Aammattaaq Naalakkersuisut aatsitassarsiorfissanut ataasiakkaanut piunasaqaataat ersarissorujussuupput: Aatsitassat suut kalluarneqarnersut apeqqutaatinnagu, inuit peqqissusaannut isumannaatsuunerannullu kiisalu avatangiisitsinnut pinngortitamullu navianartorsiorfitsinngitsumik piiarneqarsinnaasut, qulakkeerneqarsimassaaq. Tamanna aamma assersuutigalugu uranitalinnut piiaanissamut atuuppoq. Suliassaq isumannaallisaanerup, peqqinnissap avatangiisillu illersorneqarnissaannik pisariaqartumik imaqaanngippat, suliassap aallartinneqarsinnaanissaanut Naalakkersuisut akuersissummik tunniussissanngillat.

Aatsitassanut ikummatissanullu inatsisitsinni tamanna tunngaviusumik tunngaviuvoq, aammalu tunngaviusut taakkua Naalakkersuisut sulinerminni tunngavigaat.

Oqaatigineqareersutut, uranitalinnik piiaanissaq pillugu innuttaasut taaitinneqarnissaannut oqartussaaqatigiinnikkut tunngavissaqartoq Naalakkersuisut isumaqaanngillat. Kisiannili – uranimik aatsitassarsiorluni misissuinissamut piiaanissamullu akuersissummut atugassarititaasut pillugit, aammalu qaqugukkut innuttaasunik taaititsinikkut apeqqut aalajangiiffigitinneqarpat inissaminiinnersoq – aalajangiinerit Inatsisartuni ukiut kingullit ingerlaneranni pisimasut aallaavigalugit Naalakkersuisut sulipput.

Naalakkersuisut matuma siulianiittut tunngavigalugit, siunnersuut itigartinneqassasoq, inassutigaat.